



碑記

唐故特進贈開府儀同三司揚州大都督南府
君睢陽廟碑

柳宗元

急病攘彝義之先。圖國忘死貞之大。利合而動。乃
市賈之相求。恩加而感。則報施之常道。睢陽所以
不階王命。橫絕凶威。超千祀而挺生。奮百代而特
立者也。時惟南公。天與傑勇。神資機智。藝窮百中。
豪出千人。不遇興咨。鬱龐眉之都尉。數竒見惜。挫
援臂之將軍。天寶末。寇劇憑陵。隳突河華。天旋虧
斗極之位。地圯積狐狸之穴。親賢在庭。子駿陳暮

以佐命元老用武彝甫委師而勸進惟公與南陽張公巡高陽許公遠義氣懸合許謨大同誓鳩武旅以遏橫潰裂裳而千里來應左袒而一呼皆至柱厲不知而死難狼曠見黜而奔師忠謀朗然萬夫齊力公以推讓且專奮擊爲馬軍兵馬使出戰則羣校同強入守而百雉齊固初據雍丘謂非要害將保江淮之臣庶通南北之奏復拔我義類扼於睢陽前後捕斬要遮凶氣連沮漢兵已絕守踈勒而彌堅。騎雖強頓肝眙而不進賊徒乃棄疾於我悉衆合圍技雖窮於九攻志益專於三板偪

陽懸布之勁汧城鑿穴之奇息意牽羊羞鄭師之大臨甘心易子鄙宋臣之病告諸侯環顧而莫救國命阻絕而無歸以有盡之疲人敵無已之強寇公乃躍馬潰圍馳出萬衆抵賀蘭進明乞師乃張樂侑食以好聘待之公曰弊邑父子相食而君辱以燕禮獨何心歟乃自噬其指曰噉此足矣遂慟而返卽死孤城首碎秦庭終惜無衣之賦身離楚野徒傷帶劔之辭至德二年十月城陷遇害無傳燹之歎息有周苛之慷慨聞義能徙果其初心烈士抗辭痛臧洪之同日直臣致憤惜蔡恭於累旬

協忠錄 卷二 記
三
朝廷加贈特進揚州大都督定公爲第一等。與張氏許氏並立廟睢陽。歲時致祭。男在襁褓。皆受顯秩。賜之士田。塋刻鮑信之形。陵圖龐德之狀。納官其子。見勾踐之心。羽林字孤。知孝武之志。舉門關於周典。徵印綬於漢儀。王猷以光寵錫。斯備於戲。睢陽之事。不惟以能死爲勇。善守爲功。所以出奇以耻敵。立謹以怒寇。俾其專力於東南。而去備於西北。力專則堅。城必陷。備去則天討可行。是故卽城陷之辰。爲克敵之日。世徒知力保於江淮。而不知功靖乎醜。論者或未之思歟。公諱霽。雲字某。

范陽人有子曰承嗣。七歲爲婺州別駕。賜緋魚袋。歷刺施涪二州。服忠思孝。無替負荷。懼祠宇久遠。德音不形。願斲堅石。假詞記美。惟公信以許其友。剛以固其志。仁以殘其肌。勇以振其氣。忠以摧其敵。烈以死其事。出乎內者合乎貞。行乎外者貫於義。是其所以奮百代而超千祀者矣。其志不亦宐乎。廟貌斯存。碑表攸託。洛陽城下。思鄉之夢儻來。麒麟閣中。卽圖之詞可繼。

銘曰

貞以圖國。義惟急病。臨難忘身。見危致命。漢寵

死事周崇死政烈也南公忠出其性控扼地利
奮揚兵柄東護吳楚西臨周鄭婪也羣凶害氣
彌盛長蛇封豕踴躍不定屹彼睢陽制其要領
橫潰不流疾風斯勁梯衝外舞缶穴中偵鈴馬
非艱析骸猶競浩也烈士不聞濟師兵食殲焉
守逾三時公奮其勇單車載馳投驅無告噬指
而歸力窮就執猶抗其辭圭璧可碎堅貞不虧
寇力東盡克滅西惡孤城旣拔渠魁受戮雷霆
之誅由我而速巢穴之固由我而復江漢淮湖
羣生咸育倬焉勲烈孰與齊躅

天子震悼陟是元功旌褒有加命秩斯崇位尊九牧
禮視三公建茲祠宇式是形容牲牢伊碩黍稷
伊豐虔也孝嗣望慕無窮刊碑河澣萬古英風

鹽官重修雙廟記

載海寧縣志

宋奉議郎太學博士岳陽鍾必萬撰

縣西舊有將軍許遠祠。後增祀張巡，亦號雙廟。則歲久失載，不可攷。宋紹興八年，詔增祀南霽雲、雷萬春、姚閻。蓋從邑人禮部侍郎張九成之請也。古屋數椽，日懼覆壓，甚不稱上之人所以訓民事神之意。宋紹熙元年，知縣事會稽陳恕，祇謁祠下，嗟惋良久。越明年，歲豐民和，始謀於邑之隱居南豐。曾伋撤廢尼院舊殿，增易之。踰年功未成，恕受代去，伋不忍中輟，於是竭力勸輸，隨獲隨創，積六年。

而廟成實慶元二年也。前殿三楹，像設巍也。神來顧歆，罔不肅祇。遂取唐史臣之贊，榜之曰：雄挺盡節之殿，挾以兩廡，圖睢陽死節，將佐三十有二人，翼以修廊，十有六楹，盡繪戰守之績于壁。如史所載，金碧晃耀，觀者心悸不翅。若親目當日之事，明年書來，諗曰：願有以記。必萬竊觀先王之典，以死勤事，則祀之。若五公者，非所謂以死勤事者乎？中興初，皆賜上公爵，俾歲時長吏致祭，籩豆牲牢，名物如上公禮，勸民之意遠矣。鹽官許公故里，舊史與圖誌可據也。獨新史畧之，或遂以公爲右相，敬

宗曾孫，迺誣公杭之新城人，殊失建祠錫爵之本意。吁可歎哉！敬宗蓋善心之子，而善心則亨之子，懋之孫也。按北史善心傳，南史懋傳，並著鄉里高陽新城，以此知舊史載敬宗爲杭之新城者，誤矣。後之人不攷，併與公誣之，烏得無辨？若夫公之名節爛然，與日月爭光，史自有傳，不必序其行事，特是正其鄉里，以堅邑人之信慕，安知無聞風而作興者乎？

慶元四年七月朔

玩齋居士貢師泰曰：予按鍾所辨云：他誌新城之非核矣。然竟以善心爲高陽北新城人，不知

隋文帝滅陳常曰我平陳國惟獲善心一人是善心原南人也又以睢陽公遠為非右相敬宗曾孫不知通鑑實言之予攷其族譜言許本高陽六朝時許暇避亂携家來鹽官傳十世名善心為隋禮部侍郎因仕北朝復宗祖族歸高陽其子則敬宗也俱為高陽北新城人同墓易水至敬宗子名適者又歸隱鹽官東審山故其子彥伯其孫睢陽公遠皆為鹽官人矣觀此則鍾所辨猶未析也後睢陽六世孫名慶避黃巢亂由昌化入新城以存宗祀後宋乾道二年新城縣令耿秉建忠烈于塔山祀遠錄慶孫主祀歲久世遷人不知考則他志載杭之新城者抑不特以北新城誤且亦以此誤也予考訂明白書于此後之惑者其泮然乎

元至正己丑泰謹識

按師泰字太甫號玩齋宣城人元至正間起授兩浙運使戶部尚書奉詔漕閩廣粟海上多警留居海寧卜築于縣東湖塘村命其里曰小菴源有玩齋集行于世其祠堂見在本縣安國寺左側 審山即硤鎮之東山也

海昌建護國忠靖威顯洪濟景佑真君加封徽

號記

元至正七年十二月日准常州路無錫州關備奉江浙等處行中書省劄付准中書省咨海道萬戶府呈平江香糯所申海運糧儲供給京師誠為重事海船遭風值寇景祐真君神力陰佑人船無虞實可嘉尚如蒙比照廣德祠山張真君加封一體重加徽號頒降宣命更賜遣官致祭庶幾上荅神麻下慰民望具呈照詳得此送禮部移准太常禮儀院關據博士廳呈議得本神既已加封八字真

君已極徽稱別難再議却緣來文開具本神事跡靈佑海運於國有功禮宐遣官致祭其頒降宣命一節宐從都省開奏頒降施行照得本神元封護國忠靖威顯景佑真君今依例量擬於舊號護國忠靖威顯之下景佑之上加洪濟二字曰護國忠靖威顯洪濟景佑真君連判具呈關請照驗准此本部議得海道萬戶府呈江浙省無錫州景佑真君乃唐之張巡載在祀典已蒙加封護國忠靖威顯景佑真君比照廣德祠山張真君加封一體重加徽號移准太常禮儀院關具本神事蹟靈佑海

運於國有功量擬於護國忠靖威顯之下景佑之上加洪濟二字合准本院所擬宐令有司更換廟額相應如蒙准呈宐從都省移咨江浙行省劄付本部依上施行具呈照詳得此都省咨請依上施行准此省府仰依准都省咨文內事理施行奉此總府仰依上施行照得景佑真君輔佐岱岳廟食睢陽寰宇有祠靈蹟昭著若不移文立祠去處照會豈能週知今奉

聖朝加封之美意爲此關請照驗施行准此照得本州雙廟元因睢陽太守許遠生居海昌盡節唐室

當時五公既同戮。立廟列祭。捍災禦患。護國庇民。于茲有年。今來景佑。真君張公。屢顯靈於海道。重受錫於徽封。固宐勒之堅砥。用以彰於盛典。由是本州官吏。捐俸鳩工。修飾祠宇。刻之於石。以傳不朽云。

至正八年三月吉日立

鹽官重修雙廟記

元嘉興路傳貽書院山長錢惟善撰

夫忠臣義士。良相名將。所以立功績。勵節操者。何代無之。求之當時。在公論而無愧。求之後世。在人。心而無忘。至於廟食故鄉。而天下婦人女子。武夫。賤隸。皆知其姓名者。蓋千百世而一見。千萬人中。不一二數者也。若蜀之武侯。唐之張許。其殆可庶。幾乎。當武侯之終。隴蜀之人。卽立廟以祀。張許之。歿。睢之人。亦立廟祀之。雖其人品。擬倫若不同。要。其奮不顧難。死而後已。則一耳。武侯以崎嶇偏方。

之蜀與魏吳抗而終不能興復漢室以死其忠於
爲國如此張許守孤城以捍安史蔽遮江淮而能
使唐之不亡雖死何憾其忠於爲國爲何如哉張
許事載唐史茲不具述張許舊祠世謂雙廟在江
之北惟睢陽有之蓋張死所也在江之南惟鹽官
有之蓋許故鄉也初廟獨祀許後祀張宋紹興八
年復增祀南雷姚三公則從無垢先生請因題其
額曰雄挺盡節之殿廟始建不可攷今制則始於
知縣陳恕而成於隱居南豐曾伋焉故基凡若干
尺長倍之中爲殿挾以兩廡圖當時睢陽死節將
佐凡三十有二人翼以長廊十有六楹繪畫戰守
之蹟于壁生氣凜然如昨日事邑人祀之惟謹凡
有疾疫水旱無不禱輒應我

國家初下江南有故宋丞相文山先生銳志恢復宋
師屢敗被獲而持節不屈過睢陽拜廟下嘗題樂
府以激烈平生慷慨之壯氣蓋忠於爲國欲爲二
公之勲業者至今過者猶能誦之不亦悲夫至正
十一年夏邑侯尹公旣蒞政治民以寬事神以敬
伏謁廟庭顧瞻棟宇傾撓廊廡不治圖像之威默
昧就滅乃捐已俸爲倡而好義者樂助之興工於

是年冬訖功十二年冬於是邦人從侯於廟而落成之求予記其事既爲文復爲詩二章俾民四時歌之以迎送神云

辭曰

睢之水兮其流湯也瞻彼雙廟兮其神孔揚孰不有死兮死而不忘困守孤城兮蔽遮淮江旌旆蠹天兮弗得南向伊誰之功兮中興于唐千秋萬禩兮歸來故鄉醜桂酒兮奠椒漿福我壽我兮東海之旁

睢之陽兮海之陬千秋萬禩兮報神之休牲牲肥膾兮雜餼羞風馬雲車兮載蛟虬雨暘時若兮歲有秋神之降假兮不可久留目送神歸兮帝所遨遊焉得忠貞兮化爲九州使我心悲兮何日而瘳

至正十二年十一月

睢陽重建雙廟記

元中順大夫江西等處行尚書叅知政事東平徐琰撰

唐張許死節。廟食睢陽。以南霽雲配。世稱雙廟者。是也。歷代贈官。皆至州大都督。既而增祀賈賁。雷萬春。復稱五王廟。宋大觀中。賜侯爵。謚巡忠烈。遠忠義。霽雲忠壯。賁忠濟。萬春忠勇。而表其廟曰協忠。紹興中。因鹽官有忠義侯廟。詔許增祀。如睢陽。又合東平太守姚閻以配。並賜爵上公。其於褒忠勵節至矣。睢陽廟舊在城南七里所。金末河南被

兵蕩燬無孑遺。邑之耆老相與謀欲構故基以祀張許。前後數十年不潰于成。至元二十有六年。主簿柴叔武率里人之好事者。以爲城南去人烟遠。香火不便。卜地於睢陽城中。面照碧堂而爲之祠。介前歸德府判監察御史王茂來問。古稱雙廟張許而已。旣以南配。又增賈雷。往制如此。今襲而復之。於義何如。仍乞文以記。余謂自古當大患難立大名節。要非一手足之所能致。奔走先後。品量巨細。人人殊。而趨事赴功之心。捐軀報國之志。則一而已。祀此遺彼。何以勸。况二公孤危之際。嘗欲割

肌以啖衆。分所愛之肉以饗士。同甘苦。齊生死之意。爲何若尸而祝之。薦寅潔。來歆來享。風馬雲車。其必景從。上下四方也無疑。遠稽唐文。近徵宋禮。俾有位而得祀者。咸秩焉。柴叔武之舉。不爲過。嗚呼。事有不切身而興懷。人有不同時而共憤。是可觀也已。余義之而有感焉。睢陽死節三十六人。史稱寧陵之功。別將二十有五。皆從巡死難。而姓名之可見者。僅二十有一。祀而弗及。今祀于廟者。纔六。他所遺落者亦多矣。或曰。忠臣義士。知盡吾忠義而已。生而心不能白於時。死而名不得聞於後。

者何謂封侯廟食足以待天下之忠臣義士則否
余曰是忠臣義士之心也有天下國家而為是言
則非所以訓故雙廟忠義之寄也將以啟天下忠
臣義士之心也錄張許而不見諸將固為唐之惜
修典祀而不遺數公余猶為天下國家幸蓋不祀
不足為諸公毫末輕重而增一祀則於天典民彝
千鈞也嗚呼是役也有足書者而余有感焉歐陽
公錄死節五代僅得三人其難如此世變日下安
得搜五百年之廢簡而盡祠睢陽死節者哉

至元二十八年四月吉日

睢陽重建協忠廟記

元嘉議大夫工部右侍郎前翰林侍講兼修
國史吉水羅汝敬撰

士之致身當時以能廟食百世使人不忘者必其
行義足以勵俗智謀足以尊王庇民也若歸德州
之協忠廟祀者其庶幾乎歸德唐之睢陽郡為江
淮保障為關陝喉衿安氏扇妖河北州郡悉皆霍
靡惟真源令張公巡以其仗節之衆赴郡守許公
遠相與力保孤城以遏賊鋒蓋以睢陽存關陝可固
東南可保而中興事績可圖也方此之時控弦之

霍音髓
草木弱
貌

羯累十萬而睢陽疲卒總數千孰不以城破爲反
掌况望其能匡復唐室者乎二公同心同力奮不
顧身城存與存城亡與亡於是疊出奇計以阻亂
畧雖力殫城陷身斃逆欽而中興之業實基於此
報功以祀室哉或曰二公之功固偉矣第剪滅亡
■在二公既死之後再造唐室郭李輩百戰之餘
爲可惜耳噫是豈足與論成敗之數耶夫中興之
功非成於功成之日逆賊之破非破於俘馘之時
向使睢陽失折衝之機則■騎長驅東南板蕩而
國用資穹廬衣纓變椎卉彼四節度者且不能取

睢陽郭李雖萬又安能克復兩京以廓清寰宇哉
矧二公既死救始至殆天以完節畀之以爲天下
後世協忠者勸不然州人之慕之久而不忘有如
是夫祀以報之誠室也同赴二公之難時則有若
名將南霽雲雷萬春城父令姚鼐單父令賈賁皆
一時人傑知有二公之命而不知有其身者故得
各以其功配享舊廟在城南七里許元至元間以兵
燹之餘廟無孑遺去城遼遠不便香火主簿柴叔
武乃卜地移置南城上近州人又間以祈禱不便
告按察僉事劉君咸州守李君志指揮使趙君勝

偕僚屬以下。乃相吉地。州治東。率諸好事者。捐俸貲。以徙焉。鳩工營建。廟屋爲殿者三間。爲廡者東西各稱。是爲門屋者一間。外門一座。皆像神儀於其中。周爲繚垣。對樹嘉木。扁以翰林朱孔易大書。協忠廟字完飾宏敞。輪奐一新。足稱神棲。而便瞻仰矣。旣落成。郡人鴻臚卿徐君永達。徵文以志顛末。嗟夫。二公之忠誠在天地。二公之勛名在史官。所不必書。若夫所以尊王庇民而砥礪名教者。固不可逸也。姑置之。麗牲之石如此。且系之詩。俾祀者歌焉。

詩曰

在昔阿犖。機禍竟唐室。有半淪風孽。狐狂獫
騰妖蹤。二十四郡誰其雄。人傑挺持張許公。一
德比義。嬰孤墉。斬梟馘獍。摧逆鋒。力幹綱紀。天
無功。宗功報德元祀同。城頭雙廟褒典崇。邇來
徙吉州。治東靈耀益振秩。益隆民康物阜年屢
豐。景貺攸萃。昭精忠。翠珉有刻。垂無窮。

至元二十八年十月

音釋

祿山本姓康其母居突厥禱於軋犖山虜
所謂戰聞神者而生祿山故以阿犖爲字

重建雙廟浩然堂記

明賜進士第奉勅清理浙江等處承宣布政
使司右叅政虞山周沐撰

予自弘治丁巳拜命浙江布政司叅政濟揚子津
而風濤大作天日晦冥咫尺不相辨恍見五神金
紫綽約中一人曰我拯汝也濟吾孫舟抵岸如故
予疑之奉勅清理首及海寧寢公署夢登五神堂
一神作曰昔者之囑忘乎予覺而又疑之越明旦
謁雙廟氣象宛若夢予大駭始知忠義公也核其
里老得大宗裔孫名昌者執肅宗賞券呈予也歎

曰夫忠臣於孝子。彼蒼責報。世不乏人。千載之下。徽翰傑然。若神明守護。而有綿亾子孫。寶藏不泯。如此英爽不昧。而常昭著。又如此。夫天之所以厚忠孝而然乎。抑神之所以神其神而然乎。此無他。公以身任大事之重者。乃浩然之氣也。夫浩然之氣。先天地而莫不有。後天地而莫不存。充乎兩間。皆是氣也。公稟是氣。故能生爲忠臣。死爲明神也。苟非是氣。則何以濟天下之大艱。以臨天下之大變。至于千百世之下。而赫顯其光乎。宐乎子孫之世祀。而精靈萬古不死也。按公諱遠。字令威。世居

塩官。涉獵經傳。善於吏道。令尹柳遵舉公。以事親未盡。忠孝難於並行。固辭而止。客至西河。卻章仇兼瓊姻事。薦爲高要令。不二載。政聲播遠。尋陞睢陽守。值安祿山叛。公與真源令張巡竭力堅敵。延二年。糧盡矢乏。烹妾及僮。羅雀掘鼠。食紙致殺。身不屈。嗚呼。公之正氣可求矣。後肅宗憫其忠。贈荊州大都督防禦使。官長子玫。婺州司馬。賜緋魚袋。大曆中。勅立廟享祭。德宗朝。追贈張巡南霽雲。雷萬春。姚閭。五人復官。次子現。大中初。刻像凌烟閣。宋真宗巡狩。見睢陽廟。刻加封侯。徽宗大觀中。

追謚忠義

國朝榮贈國公爵。非天地之正氣而崇報若是乎。然予懷尚友實竊景瞻。其祠墓寥闕。子孫飢寒。故英風爽氣。不能不召感於予也。予故新其廟。葺其居。復其基業。令祀宗廟。卽建浩然堂於祠側。俾其居以奉祀。英靈如在。必妥之矣。噫。怪力亂神。予所不語。今以一忠之感格。昭乎青史。神乎天地。參乎陰陽。使天下之人。萬世瞻仰。如一日也。予非諂且不佞。書以俟後之觀者。有所感發云爾。

弘治十年歲次丁巳望

重修雙廟并建協忠門記

明文林郎知海寧縣事貴池孫溥撰

舉人

流行穹壤間。理與氣耳。明而人。幽而鬼神。孰非是物之所爲耶。惟神稟正以生。能勿喪焉。則克於百體者。一此浩然之氣。而後道義得以憑藉以行。居常應務勇決。固無容置喙。若出而仕也。自足以決天下之太疑。濟天下之大變。不幸而國難瀕危。必勇抗敵兵。力扶社稷。挺挺乎烈丈夫矣。又不幸卒以忠死。彼浩然之不死者。尤有以參二氣之良能。而妙應乎萬物。其亦鬼神之至靈矣。唐睢陽太守

許公遠。茲海昌人也。立宗朝。安賊倡亂。河以北多叛而降。天下幾非唐有矣。公忠義奮發。乃會真源令張公巡。相與鏖守孤城。困急不下。且間出奇攻。襲以挫逆鋒。俾有所却。顧弗敢大肆長驅。卒致江淮有所敝障。而國祚再延。唐之長城也。已柰何餘。蕃鎮皆逗遛觀望。而援餉後期。陷公食盡力窮。仰天以斃。嗚呼惜哉。昔在睢陽。以達江淮。左右公之。焄蒿英顯。凜々如生。凡德其捍衛保全者。罔不祠而報之。雖死弗死也。夫公死所。去家逃矣。海寧實其父母邦。然宵冥精靈。尤覺眷戀桑梓。故感而遂

通。視他邦有特異者。公生平忠自孝。移又有明徵也。則邦之後生。仰其道義高世之風。報其忠孝範俗之懿。抑豈他者視例哉。宐其廟貌之尊嚴。祀事之洗腆。而敬畏奉承之靡間。無怪乎其然矣。且旱潦則禱之。災患則籲之。出入起居則告之。頻顯竒應。猶影響焉。至是邦人又籍之爲福神矣。嗟夫。忠臣孝子。何代無之。惟物故飄風過耳也。曾如公之。旣沒世神而靈者哉。鄉先生祠何地無之。惟常祭畢。塵封草塞也。曾如公祠之鐘鼓升籩。無虛日者哉。予以是益知其神與造化同流。而享祀同天地。

無窮矣。有司敬信當何如哉。祠在邑治西徧舊合祀張公巡。附以南霽雲雷萬春暨姚閭亦倣睢陽者曰雙廟。官有時祭。遵朝典也。第棟宇敝久。修者因循。乃正德庚辰冬十二月初。貴池孫溥來視。邑篆始拜瞻。此心輒戚。然明年辛巳春。屬耆民諸輔周富周瓚勸諭百姓胥樂從。於時出貲協助。具材鳩工。未幾易腐以堅。易朴以文。殿寢廊廡煥然一新。外拓地以闢神道。道之中仍伐石爲四柱。屏門若櫺星。扁曰協忠。偉觀自今始也。興事正月之初。越明年嘉靖壬午秋七月上旬。典史黃江督役

報成。請記之。因以告後官君子。庶修復久近。有可考見云。抑張真源之烈。史載與公同。茲畧脩而致詳於此者。寫邦人崇嚮鄉先生之私也。

嘉靖元年歲次壬午秋七月

廣南潮陽東山雙廟遺事

按潮陽志熙寧

宋神宗年號

間郡遣軍校鍾英部領方

物貢於朝道經歸德謁雙廟丐靈夜夢神語謂有神像十二銅輓一閉後殿敗匱中錫汝奉歸以祀於潮陽之東山東嶽廟左可數十步有佛寺寺之陰有大石屹立于其上下窰建祠以妥靈英趨京卒事遂具酒脯答神貺取所賜神像銅輓而還相傳英自睢陽來僅一夜而抵於潮陽之門闕門闕潮陽界也初不之覺既而聞鄉人飯牛音始知其已至潮英遂抵東嶽置神物於廟俄而英立化時

有玄旌樹於嶽麓隣寺中夜見光怪僧徒走白有司請移寺以宅神由是公私有禱其應如響事聞於上賜額曰靈威二公冊封王爵

張封忠靖福濟昭聖靈祐王

許封善利威濟衛聖孚應王 英亦封嘉佑侯潮

人慕二公神靈其祠而祀之不一而足然其最顯靈異則潮陽之東山海陽之龍湖里尤其表著故得並稱云 後文天祥謁廟題詞詳三卷下

宋紹興遺事

見據青雜說語載鴻書又載寧志備攷佚事

紹興辛巳夕朝廷遣大軍東屯主將每遣小校四出偵探有何兼資者領衆至六合西忽望見一軍自西北來其行甚速號令下寨兼資與所部隱蘆荻中須臾聞傳令曰荻林中有人否一人曰彼中乃生人與吾無關兼資知其爲鬼兵也乃詣寨門請見曰某宋劉太尉下踏白軍也須臾召入見中一人廟坐服色如天神又四神分坐左右兼資拜問神兵何事西向者曰此天蓬神司主事我四人張巡許遠雷萬春南霽雲也兼資曰唐書言大王

守城。凡食三萬餘人。果否。巡曰：有之。而實不然。所食皆將死者。非生人也。兼資曰：史書張大王殺婁妾。許大王殺婁奴。享士果否。巡曰：非殺也。妾見孤城危迫，効節自刎。許奴亦以憤激自死。因烹以享士。蓋以堅士心耳。兼資顧雷面，上有癍。問曰：何也。雷曰：當時實著六箭，而二著兜鍪。賊傳吾面中六矢。吾亦當之。庶揚名以威■耳。須臾命酒，惟天神者不食。良久，巡謂兼資曰：歸語汝王將。吾奉天符助兵，並當取其首，以報上帝。語訖，命引兼資出。及至舊所，無復人矣。不半月有皂角林之捷，未幾逆亮有龜山之禍，皆如其言。

重修雙廟記

明賜進士出身奉詔進階朝列大夫同知直隸楊州府事前刑部清吏司員外郎邑人

沈友儒撰

邑治西里許，為唐忠臣五國公廟。初祀睢陽太守許公遠，繼以御史中丞張公巡。後兼東平太守姚公闇、開府南公霽雲、將軍雷公萬春。後殿祀五公夫人及張中丞姊陸義姑與愛妾吳氏。宋叅知政事樓公鑰大書協忠，而綽襖因以名之。仍稱雙廟。從初額也。春隨丁日舉祭，秋移于許公十月十六

協忠錄
卷二
三
盡節之日。歷代崇奉。具載邑乘。于協忠錄。廟自嘉
靖元年重修。歲久漸隳。丁巳倭彝躡境。古亭蔡侯
禱于廟。賊見空中協忠旗幟。悸而退。歲丙辰。許公
奉祠孫繼祖。以新廟請。蔡侯捐俸率義。前後二殿
一新。久之又圯。隆慶壬申。繼祖之子國忠鳴于署。
篆別駕兩峯周侯。捐俸締構。萬曆乙亥。鶴麓陳侯
洒翰闡褒。益加資助。既而予告紹亭查君。以感夢。
聿新正殿。黝堊炳然。寢殿門垣。廊廡圖繪。忠自募
葺。同里省心居君。與有力焉。訖工。請如睢陽。以單
父尉御史賈公賁。侑饗及舉許公義僕名進喬者。

祀於廊廡。制事悉脩矣。忠介里士濮應奎徵記。余
惟二公忠義爛然。與日月爭光。先儒論之詳矣。獨
史以城陷而救始至。謂天以完節付二公。畀名無
窮。若快其救緩等。二公於捐生殉名者流。豈知二
公之心者哉。天生偉人。非惟彌一時之亂。將以興
一世之治。正學全才。素得士心。如二公三十六將。
又皆人傑。挺特使早救俱生。其蜚英騰茂。李郭不
足多也。顧張鎬率四節度趨援。卒爲閭丘曉所撓。
俾二公賁志以歿。千載扼腕。且宋朱子有云。使明
皇早用巡等。豈不消患於未形。巡等早見用。何至

仗節孰謂生而其名遂損耶雖然古今事變未始不成於同敗於異當二公裹瘡百戰使虢王巨始從賜物之情既不強分城中積儲以他給則餉足兵強梟潮馘竒叱咤間耳假令食盡告急進明應援城未必不全乃進明嫉忌二公雖南公嚙指乞援哀甚包胥竟不能應論者追咎房瑄以私憾用許叔冀爲都將以制之致使忠良荼毒則師之不出豈獨進明罪哉故保障江淮再造唐室固中丞壯猷諸將僇力若非許公忘分與年授中丞柄而處其下佐以姚公之志合謀同雍德讓則猜沮

携貳欲求國步幹旋中興克濟其將能乎唐以數公位尊九牧禮視三公恩亦渥矣君子猶爲中丞初保寧陵別將二十有五後皆從隕於難而姓名可見者僅二十有一祀而弗及至欲搜五百年廢簡而盡祠之則今增首從中丞舉義戰歿雍丘之一賈公尚何疑焉陸義姑依弟軍中陳機事以說統戎躬補縫以拊士卒首先授命視聶政姊榮暴骸白弟烈同而義過之寵姬之從容受醢家童之自刎克羨成夫之義遂王之忠非無益成敗者祀不亦安乎邑自妥靈前賢張無垢制百籤於廟有

祈輒應。邑人謹事之。稷祠不啻也。元德中丞擁護海運。加封十字。奠出中朝。飭祠勒石。比年耀威。却賊禦患。彌災樂歌。所謂福我壽我。東海之旁。久而彌殷。嗣是薦膺殊錫。不有趨於前。襪者歟。嗟乎。文文山精忠大節。有光張許。識者於其題。淮陽樂府占之。語云。雙廟忠義之寄。將啟天下忠臣義士之心。信矣。然則協新廟貌。有俾風教。豈不大哉。國忠為博士弟子員。前署董學政。臬長谷公。允慎軒辛侯之請。錄忠裔也。修祠葺墓。不忝象賢。愛妾吳氏。追封天仙九娘。載錫山張中丞碑記。忠義進裔。

追封千勝將軍。出歷唐演義云。

萬曆三年歲次乙亥仲冬。

按無垢箴詩事實。載寧志備攷。雙廟協祀五公。凡有所禱。某事者。向置銅鞮一具。刻上中下三字。祝畢。將鞮擲之。以定吉凶。乃為趨避。後至紹興八年。邑人張無垢先生立就詩百章。每公各占二十首。書於木片。候海潮至。時投之。而祝曰。順潮去。不取。遡流而上者。則用之言。未已。見詩。宋逆水而至。名之曰。倒流箴。取而送之。廟內中。遺失九首。則曰。罵箴。祈者先期齊沐。及往廟路。遇親友。勿與揖。亦不與言談。否則必得罵箴矣。益罵箴語中。多著譴語。以激不恪也。其箴詩。因示鄉人。故近于俚鄙。然頗有靈驗云。

按千勝將軍廟。在杭州。弼教坊。凡遇冬至。決囚之日。劊子手先一晚齋宿于廟。祭刀。是夜刀響若干聲。則決囚名數。毫厘不爽。每年遇月。生日坊。

里居民賽會與鹽
官雙廟會等盛

許侯廟碑

碑被回祿所毀

明賜進士第前河南按察司

副使整飭大名道兵備事歸安茅

坤撰

許侯名遠字令威世居鹽官洛溪里由唐天寶進
士累官睢陽太守安祿山反而兩河及山東西州
郡之陷者殆千里土崩矣按韓愈序張中丞傳逸
事稱公開門納巡位本在巡上授之柄而處其下
竟以巡俱守死又曰兩公守一城捍天下以千百
就盡之卒戰百萬日滋之師蔽遮江淮而阻遏之
唐室幾為天下裂而以己為存者其功也嗟乎予
讀傳記至此未嘗不為之欷歔流涕而毛髮鬚眉

張裂眦以起別按許生忠所抱家世譜代宗朝中
典功臣以兩公及南霽雲爲第一圖像凌烟閣勅
拜長子玫爲婺州司馬妻以郡主復拜次子現爲
左金吾衛將軍大曆二年詔葬冠劍於其鄉而廟
祀之已而後梁增祀張公廵而宋紹興八年又益
之南雷姚三公稱協忠祠非也何羣而祀之睢陽
則可羣而祀之於其鄉則不可洪武四年禮部建
言許公遠張公廵並廟食睢陽而今海寧則許公
故所生之邑里曰鹽官是也法宐專祀 高皇帝
令有司祠春秋歲徵祀額金八兩載在大明會典

頃者有司議均平遞減祀額金二兩伍錢及括祭
田故所優之以准輕折者並罷去之而萬曆十三
年縣令陳君楚產來許生忠首請之陳令索款低
徊不自已於是以其言牒之郡二千石俞公其畧
曰許公遠之死仗忠義泣鬼神而與日月爭光者
高皇帝採禮官議祀之於其故邑里蓋所謂不忘
蛟龍之始蟄於其宮而特令冠帶祠春秋聞古者
賢哲之墓猶徃徃百世下禁樵採而復其家而况
許公之死以捍王室翊社稷者乎邇來廟貌漸頽
甚者前有司議減會典所載祀之費又從而籍其

故所遺祀田與民間賦筭等甚非所以稱國家錄
忠崇祀之意謹飭廟貌併述故事本末以聞郡二
千石俞公又故多大畧持大體者爲之躍然上之
撫按及籓臬諸司撫按及籓臬諸司並報曰祀如
故其如原額金會典所載祀田若干畝其以近年
丈量而羨者抵辦無令與民間例賦筭生且懼後
之世易或牒且旁落沒無攷請鄉大夫居公守移
書屬予曰我鹽官乃許侯者始所射桑弧蓬矢之
里也 高皇帝首採禮官言特廟祀之著爲令卽
周武王之下車而封比干之墓也今郡縣爲之葺

其廟併題其額而曩之龐雜他附者之祀與祀田
之例爲賦筭者並罷去卽古循吏所稱以經術飭
吏治者之遺也我鹽官之山增崇而水增濶當與
日月俱遠矣况今少傳潁陽公諱國卽侯之二十
八世之裔孫也其所佐 天子日月之際忠貞博
大殆與侯千年來後先照耀而許生國忠卽其族
子且聞子大夫故嘗與少傅公爲布衣交得無賜
之片言以紀其事照來世乎予於是次第其言而
系之以樂歌三章令里之人肄而習之以備有司
者之他日尸祝而俎豆焉其辭曰

祿山叛起冀方侯提卒抗睢陽援兵絕軍無見糧力竭以亡 一闕

羅雀鼠殺奴妾饗辱兵奮且振枉矢夜光櫬槍滅尋就縛河山流血 二闕

賊不渡淮誰之功唐室且振除殘克圖凌烟勒廟宮千載之下問無窮 三闕

或問許侯祠乃附以張公廵南公霽雲雷公萬春姚公間者蓋出于後之人所嚮往而並列之者如此朕非高皇帝之所採禮官議祀于其鄉之初也似矣狀傳曰有其舉之不可廢也今且從而毀其像而黜之得無不可乎日請額其祠日許侯廟為前殿三間以祀許侯而後且增祀三間于中堂則許為左張為右並南嚮而配食以南公霽雲而下為東

西嚮茲則專祀許侯于其鄉者之義既正而張公以下之共事被難者因附見之亦可也故日協諸義而協則禮雖先王未之有可以義起者是已

茅坤識

載玉芝山房稿

賜進士文林郎知海寧縣事晉江尤應魯立石

萬曆十三年歲次乙酉六月

寧波府改建協忠廟碑

明賜進士第通議大夫太子賓客吏部左侍郎兼翰林院侍讀學士充經筵日講記注起居會典副總裁郡人沈一貫撰

協忠廟者祀唐御史中丞張公巡睢陽太守許公遠馬軍兵馬使南公霽雲東平太守姚公閻裨將雷公萬春單父尉賈公賁也六公當天寶末逆起漁陽陷兩京呼百千垂沾之卒抗億萬勤攻之師保寧陵阨睢陽大戰七十小戰三百不能越睢水尺寸江淮獲完其忠載於海內兒童之口矣

睢陽舊有雙廟。又有六王廟。海寧亦有雙廟。春秋祭享。以許公所生之地故也。大中時。德宗詔工圖張許南三公像於凌烟。我郡去睢陽遠。六公車輒馬跡之所不及。而有廟自宋始。蓋高宗嘗避金兵。六公眎異。網蛛於門。著六燾於雲端。駕獲以航。遂肖而祀之云。夫宋不守汴。二帝北而騎日夜南。六公之靈。所以切齒磔鬚。碎首齧指。奮爲厲以殺賊也。使六公猶在。寧使騎日夜南而踰淮渡江。東薄於海邪。忠誠義烈之在人心。猶日行天水行地。無之而非。是必曰車輒馬跡之所及。而後尸祝。

之是竭水於山。窮日於隙。非通論也。廟始在奉國樓。萬曆乙酉。災於火。郡守姑蘇張公文奇。郡丞武陵龍公德孚。鄞令湘潭周君之基。詢謀於衆。改建於樓之南四十步。構堂三楹。外門垣庖幅具。稱特云。

萬曆十七年歲在己丑春二月朔日

泰昌癸亥歲二十九世裔孫許象賢薄遊明州錄此而附載之。蓋五公著靈之地。及名公碑記。當徧滿域中。今所恨者。正以耳目未盡及遺闕者多耳。

重建世家亭記

邑人沈友儒撰

明進士

吾邑東北長平鄉稱世家者唐忠臣許公令威誕
生斯地宋駙馬楊公由義隱居邨中旌表忠義種
德淵源奕葉昌熾家以世稱蓋無愧云然其地洛
溪前橫龍涇後遶而兩硤左峙張店右屹一水北
流爲嘉湖要津鹽舶出入犬莫生甃有壩控扼埧
北里許爲村宋咸淳間駕石爲梁因名世家橋復
構重屋于茲供養神像仍橋之號曰世家亭實嘉
靖四年正月也歲久又圯萬曆癸未葺治亭翼然
洛溪之水溶溶流入亭下襟裾環遶之浜一十有

三雁行旁達之港有九亭據其中不特鍾靈毓秀
爲一方美觀卽風雨驟至行者休其間烈日當空
渴者飲其下返照斜陽耕者農談于簷隙滿汀皓
月漁舟纖楫于軒前日中則商賈貿易昏黑則鍾
鼓鏗鳴梵音釐祝遐邇皈依潛弭奸冗曩者煮海
之利眈眈跋扈于斯者漸掣肘而村人稍寧矣一
亭雖小有禪地方豈淺鮮哉忠裔國忠許君徵記
余嘉世家有後天道與善不爽如此書而遺之俾
嗣守者攷焉

三十世裔孫許以恭復捨地改建後殿崇
大清康熙八年己酉歲

重修一新

勅賜荊州都督許公神道碑

唐銀青大夫右散騎常侍輕車都尉宜城縣開國

伯汝州柳渾撰

公姓許氏諱遠字令威世居鹽官洛溪里舉天寶
壬辰科進士除高要令蒞政凡二朞頌聲洋溢擢
睢陽守時羯 煽殃公協真源令張公巡扼孤城
拒百萬醜 大小數百戰歷萬艱不少回折士卒
待哺烹僮妾食之援兵後至竟以死殉忠烈昭著
古今所甚難者

聖天子濟中興多其功詔贈荊州爵字孤羽林可謂

榮矣大曆二年 嗣聖睿意以公薨泊殊方
敕立廟錫祀命公子司馬招薨歸葬故土公子築墓
於公讀書林西合慈義郡太君窆旣葬且銘復碑
墓道顯揚芳烈徵渾言渾嘗服役江浙英肝勁節
昭然心曉惡乎辭乃曰士君子學問充於前爵祿
養於後克濟大事臨節不可奪所以身綱常立人
極也忠義如公勲業如公殆日月爭光爲天下後
世人臣法此天理之在人心不容泯也鴻惟我
皇以聖繼聖統承德業大興文治首風化之原益褒
崇之典慰忠薨於九泉播仁風於千載使天下之

爲臣耳目所聞睹輒油然而生忠義之心而思所
以樹勲庸圖報効於無盡則此典之盛詎惟宣我
皇浩蕩之仁當爲聖子神孫億萬年無疆之福也故
謹撫公行實永於石碑過斯墓而讀之者凜然髮
豎激烈慷慨且知

帝之寵公也非過公之承寵也固宐風世勵俗千古
其一時哉公生景龍己酉九月十八日卒于至德
丁酉十月十六日壽四十九爲高陽公敬宗曾孫
太子中舍彥伯子也配柳氏卽慈義郡太君二子
玫瑰司馬金吾士林顯族云

大曆二年歲次丁未十二月吉日立

墓銘

禮部尚書杜確撰

睢陽太守靈德太君死國曰忠死家曰貞夫婦雙節萬古芳名

天子錫葬崇榮厚死骸莫同封神妥于此鬱七洛塘龍蟠鳳翔巍乎泰峙地久天長羽林繁祉其無疆

按許公墓在海寧洛塘載入大明一統志及海昌圖經廣輿記又載楊園村今坏壠舊址尚自巋然故老猶能言之而世遠遷改蹂躪于他姓神道碑亦毀沒今為許氏有者司馬葬天竺庄金吾葬雞籠墩公之三公子瑰墓張店許三洪止此三墓耳

宋海寧圖經

許遠杭州鹽官人為入寬厚長者明吏治會祿山反明皇召拜睢陽太守至德二年祿山攻睢陽遠與張巡姚閻南霽雲雷萬春堅守以抗賊巡以兄事遠遠自請居其下相與戮力大小四百戰至死不屈江淮以全多其功也天子下詔贈賜立廟睢陽至今祀焉號雙廟云章聖皇帝東巡過其廟留駕裴回咨巡遠等雄挺盡節鄉人亦立廟于縣之西因以雄挺盡節名其殿紹興八年邑令聞于朝錫以上公爵歲時長吏致祭載在祀典

明海寧誌

按梁大同二年建蓋防風氏廟也唐敕改許公雙廟移防風大王于西廡配祀賈賁

雙廟唐睢陽太守許遠廟在縣西一百三十步臨

安志云梁大同二年建後增祀張中丞巡亦號雙

廟宋紹興八年縣令胡旒與邑人禮部侍郎張九

成請于朝併增祀南霽雲雷萬春姚閻詔許之皆

賜上公爵號五國公先是增祀張巡故世但號為

雙廟致祭公盡節之日洪武四年禮部定擬本神

盡忠死節雖與張巡廟食睢陽緣鹽官乃其所生

之地理宜廟祀今擬稱唐睢陽太守許公之神載

在會典又載大明一統志

按廟宇被隣火延燒于明萬曆四十八年六月十三日有邑人陳玄成夜夢神囑捐資首創前殿成于崇禎戊辰年七月後復傾圮至大清順治十五年修造前後二殿

許氏族譜誌

令威公諱遠世居鹽官洛溪里為人寬厚涉獵經

史明吏治初公始生也母褚夫人夜夢神以星納

懷中悸覺遂產公魁梧不凡幼與群兒戲有異人

識之曰莫安天下屹樹大防舍子其誰哉及肄業

師曰識量過人遠矣遂以遠命名公仁厚孝敬根

於天性莫不重之去家里許有泗水亭者歲有木

石之青為害人不敢逼惟公愛其地僻結廬亭陰

讀書其下其所言爲肯者恬然不聞鄉益異之時
開元中令尹柳遵采訪賢良大中正舉公公以事
親未盡忠孝難於竝行固辭而止後親徂落客至
西河却章仇兼瓊姻事爭薦之中天寶壬辰科進
士除高要令蒞政息煩從簡不二載政聲播道尋
陞睢陽守天寶十五年孽古安祿山叛流毒海內
河洛公與真源令張公巡竭力堅敵延二年
糧盡矢窮與士卒同食茶紙茶紙盡遂食馬馬盡
羅雀掘鼠_匕又盡張公烹妾吳氏公烹義僮名進
喬者以食士然後括城中婦女食之繼以老弱人

知必死莫有叛志十月八日賊登城將士罷病不
能戰張南雷姚諸公并三十六人皆死節賊將尹
子奇議以屠城必生致主將爲功公爲睢陽守主
將也故獨將公檻車送洛陽偃師慶緒囚公於客
省勺水不入口終無降志至十六日使嚴莊害之
肅宗憫其忠贈荊州大都督敕睢陽本鄉皆立廟
歲時祭祀及欽降八角層樓殿式官二子玫瑰公
生於景龍三年己酉卒於至德二載丁酉壽四十
九時有義士收公屍葬於偃師北卽後代宗敕長
子玫瑰刻形圖狀招魂歸葬於本鄉以便子孫春秋

祭掃故借靈德慈義柳夫人合葬張店村離洛塘五十餘武謚曰忠義

故廟誌

有銀杏樹四人圍抱相傳伐之血出鋸縫復合萬曆初居民患痢取皮煎飲愈如此神異

唐至德二載十月敕贈公荊州大都督十二月敕

拜公子玟婺州司馬妻以霸王郡主乾元初司馬

建廟于泗水亭亭原公之讀書林宋高宗御製哀

辭吊廟車駕幸墳祠御題忠臣書院其廟顏曰故

取竟歸故鄉意也奉公暨太君像公子朝夕躡踊

其中

唐廣文館博士鄭虔為之記廟配享禹秦二王禹秦乃封號也禹湖州烏程人秦杭州臨

平人同仕北魏有功封此但史冊無載惟硤石土地廟碑可攷及劉文龍同為士毅神至今不改

許氏世系考

二十九世甥 陳鼎新訂正

舊傳云遠杭州鹽官人世仕江左曾祖高陽公敬

宗龍朔中宰相自傳遠初從軍河西為積西度支

判官章仇兼瓊鎮劔南又辟為從事慕其門欲以

女妻之遠辭兼瓊怒積他事中傷貶高要尉後遇

赦得還祿山之亂不次拔將帥或薦遠於宗召

見拜睢陽太守按敬宗乃善心之子善心則享之

子懋之孫也懋本傳云魏鎮北將軍允之九世孫

善心隋散騎常侍傳在北史亨陳衛尉卿懋梁中

庶子由懋而上曰勇慧齊太子家令曰珪宋著作

郎曰詢晉徵士傳皆在南史與唐舊傳世仕江左之說合惟並著其鄉里曰高陽新城或曰北新城按唐定州博陵郡本高陽郡又高陽縣屬羸州新城縣屬涿州皆河北道方南北分裂仕於江左者其家安復在河北許氏此時固已爲江左之人矣善心以下雖仕於北而新書唐史以敬宗爲杭州新城人遠爲鹽官人且曰其先自高陽南渡信矣又按古今姓氏辨證允三子殷勤猛孫式式生皐皐生詢至懋爲八世又云敬宗生昂昂生彥伯彥伯生望望生遠于敬宗爲高祖與梁唐史世數稍差

重修許氏宗乘各賢世系序

宋金紫光祿大夫翰林學士宰相舒國公臨

川王安石撰

伯夷神農氏之後也本姜姓佐堯爲太岳有大功其後周武王封文叔以續太岳之祀賜以男爵周衰嘗從文侯會盟征伐竟於春秋及後世無復國而子孫以其始封爲姓焉漢興許氏封侯者六人相至侯益宋子侯契嚴侯積此三侯者皆起於將功而史未悉其州里平恩侯廣漢博望侯舜樂成侯延壽此三侯者同產昆弟也以外戚起於漢宣

元之世昌邑人也。蓋孫昌嘗爲宰相。廣漢弟延壽子嘉嘗爲大司馬。至王奔亂。許氏始皆失其封。云後漢會稽有許荆者。循吏也。許慎以經術顯。許峻爲易林傳。許楊治鴻隙陂。有德於汝南。汝南之民報祭焉。許靖者。避地交州。復入蜀。先主以爲太傅。與從弟邵俱善論人物。邵兄虔亦知名。稱平輿有二龍焉。而慎峻楊靖皆汝南人也。獨是許褚者。家於譙。惜其有忠力而事魏。封牟鄉侯。許慈者。家於南陽。入蜀。父子皆爲博士。司馬晉時許孜者。東陽人也。德行高。察孝廉不起。老於家。其子曰生。亦有

至性焉。初許氏爵邑於周。而子孫播散四方。有紀者。猶不乏焉。至昌邑始大。著聞於汝南。其後祖高陽者。爲最盛。高陽之族。諱據者。仕魏。歷封郡守。生允爲鎮北將軍。允三子皆仕。司馬晉奇。司隸校尉。猛。幽州刺史。奇子遐。爲侍中。猛子式。平原太守。自允至式。皆知名。式後三世。詢。司馬。晉召之不起。孫珪。爲旌陽太守。仕於齊。珪子勇。慧。爲齊太子家令。慧生懋。篤。學以孝聞。卒於梁。爲中庶子。懋子亨。爲陳衛尉。卿。嘗領史官。次齊。梁時事。亨子善。心。爲之卒業。是時許紹者。善心族父也。守夷陵。以恩流戶

協忠錄 卷二
自歸者數十萬卒有勞於唐。爵安祿郡公。圍師欽
寂欽明皆其後也。圍師紹少子。寬博有器幹。別自
封平安侯。與敬宗俱爲龍朔中宰相。欽寂爲紹曾
大父也。萬歲中。率師當契丹亂。爲所敗。執以如安
東。使說守者。降至安東。曰。賊今且破滅。公勉守。無
忘忠也。契丹卽殺之。是歲弟欽明梁州都督。按行
道遇突厥。使說降。至雩州。顧諛言告守者。所以破
賊之故。竟被害。兄弟將兵。一旦同以身殉邊鄙。賢
者榮之。敬宗者善心之子也。始以公開郡於高陽。
與其孫彥伯。以文名當世。敬宗有孫曰遠。與張巡

以睢陽抗賊久之。食乏無助。煮茶紙以食。猶堅守。
賊所以不得南向者。以睢陽弊其鋒也。卒與俱死
者。皆天下豪傑義士云。遠子玫瑰。現居鹽官。玫爲婺
州司馬。配賜郡主李氏。現爲金吾大將軍。唐亾。遠
孫儒不。朱梁自雍州入江南。隱居歛之黃墩。終
身不出焉。儒生稠。仕江南。李叅德化王軍事。稠生
規。好道家言。嘗羈旅宣歙間。聞傍舍人呻吟之曰。
我某郡人。察君長者。今且死。願以屬君。因指囊中
黃金十觔。曰。以是交長者。規許諾。竟負其骨與金。
千里至死者家。大驚愧之。因請獻金如亾兒言。以

爲許君壽不受竟辭去聞者皆以規爲長者後因子孫貴贈大理寺評事生子三遂迺迺

天子以遂爲將作監主簿遂子俞知名文章大臣屢薦之嘗知興國軍大治百姓至今傳焉二子均皆登進士逃守景山嘗上書江南李氏寄之拜監察御史有子五人恂黃州錄事叅軍恢尚書虞部員外郎怡今爲太子中書舍人簽押淮淮南節度判官廳公事元今爲江淮荆湖兩浙發運七年遂爲待制天章閣自

天子大臣莫不以爲奇材平爲泰州海陵主簿迺嘗

從仕復不出有子會爲進士亦慨然好議天下言此一門者咸孝友如其先人故士大夫論家行者稱許氏然余補許氏自據以下其傳又顯亦自許男國於周其後數封而有紀之子孫多焉於以論之夫伯夷之所以佐其君治其民余讀書未嘗不喟然嘆息之也傳曰盛德者必百世祀若伯夷者蓋庶幾焉俾其子孫忠孝之良亦使之遭時沐浴舜禹之間以盡其材而與夫臯夔熊虎之徒俱出而馳焉其孰能禦之耶

熙寧六年歲在癸丑仲春中澣之吉

三十世孫許全臨增輯 辛丑科進士任昌邑縣知縣

清康熙十年歲次辛夷二月上浣重刊

恩典

欽賜許公春秋祭祀銀捌兩載在會典有司議均平
遞減祀銀貳兩零本縣舊額全書止載祀銀陸兩
至

清順治十三年丙申復蒙

欽定賦役全書達 部開載

先賢許公顏真卿張九成額派祀銀玖兩陸錢內
許遠祀銀陸兩春同

天地二壇致祭秋于十月十六盡節之日有司至期
行禮于存留額派銀內動支給辦

又許公祭祀不敷于明萬曆十三年乙酉浙觀察使
吳公諱自新申蒙撫按二院會議加增銀肆兩載
入全書至

清順治十三年丙申復蒙

欽定賦役全書達 部開載

預備本縣雜用銀三百三兩九錢九分陸釐八毫
內以七分聽上司行文取用三分聽本縣公事
支銷開載許公祭祀不敷銀肆兩俱于內支取
年終造冊院司查核至康熙五年五月內會議
將前備用銀除解藩司外存留仍註不敷銀兩

欽賜祀儀 元至正十三年欽頒特牲遣禿堅致祭

猪壹口壹百貳拾觔 猪首叁枚每枚捌觔 鵝

叁隻每隻陸觔 魚陸尾每尾貳觔 兔壹隻

降香壹炷計捌兩 牙香陸兩 末香貳升 金

帀馬伍副 大紅燭陸對每對計貳觔 照燭陸

拾枝 幣帛壹端計貳丈 稿魚伍尾每尾捌兩

和羹肉貳觔 和羹魚貳觔 祭酒壹大埕 荔

枝 龍眼棗栗榷各貳觔 藜橘菱肉各貳觔

蔗藕各伍觔 黍稷稻粱各肆升 油鹽醬醋各

壹觔 白酒壹埕 川椒肆兩 茴香壹兩 紅

麵壹升 祝板帛床各壹副 柴貳束 祭文紙
筆墨各壹件

欽賜祭器 俱洪武四年重新製造

銅酒樽壹 銅爵拾伍隻 上鑄洪武四年 海寧雙廟 籩貳拾

豆貳拾 簠拾 簋拾 篚壹 牲匣壹 連牲

盤叁 几卓壹 祭卓伍 祭餘賜承祭之子散

胙有差

已上祭器至明萬曆四十八年庚申六月十三

日被隣火燬訖 清康熙七年戊申十二月裔

孫許 以政 奎章 同鑄爵五隻

協忠錄卷三

二十九世孫許南金增訂 男以政

侄奎章全校

祭文

敕祭海寧雙廟文

宋高宗紹興十三年十一月初八日遣宣教

郎知臨安府鹽官縣主管勸農公事李份

致祭曰

維茲列侯均稟忠勇氣吞羣賊孤城被圍援兵絕

述將士皇皇。空腹累日。不惜愛肉。以資一食。勢窮力殫。至死不屈。血食南都。棟宇翼翼。

真皇東封。廟貌增飾。惟此海昌。父母之國。英靈自唐輝耀。丹冊。

天子初郊。無文咸秩。忠臣義士。尤不可失。設此豆籩。以祈來格。尚饗。

音釋

殫都艱切音單說文同盡也竭从反單聲

祭海寧雙廟文

宋度宗咸淳二年十月十六日通直郎知臨安府鹽官縣主管勸農公事兼兵馬都監主管監吳由等敢昭告于

雄挺盡節五國公之神。由聞之。夫子曰。齊景公有馬千駟。死之日。民無德而稱焉。伯彝叔齊餓于首陽之下。民到於今稱之。富貴無能磨滅。誰紀惟忠義之士。百世之下。聞其風者。莫不興起人心。天理之所同也。唐安史之亂。竄身奉賊者。何可勝計。屹然砥柱於大河南北。惟平原與睢陽耳。卒之捍蔽

江准以濟中興實維睢陽死守之力太守許公茲
邑人也始與城父令姚公決固守之謀終與張都
督南開府雷將軍諸公盡偕死之節蓋與此城相
爲始終存亡者孤忠偉績天下後世所同欷歔歎
息况父母之邦乎邑有廟奉五公暨諸將歲時惟
謹獨於盡節之日未有表而出之者由幼讀書而
知有睢陽戰守之烈茲試令而獲在武原忠義之
鄉私竊以爲榮幸因與邑寓楊君訂之舊史質之
通鑑參之長曆夫然後知睢陽陷於孟冬之九日
後七日而許公竟以不屈死輒於是日載舉祀事

於廟庭之下以補舊典之缺以慰邦人之思嗚呼
士之舍生取義義有重於泰山死有輕于鴻毛彼
其見之明斷之果守之固此心所存知有主其國
耳身且不暇顧况暇計其時與日哉史冊之可稽
時日之不泯天所以彰忠義之迹使來者因得以
致其哀慕景仰而感發其忠義同然之心也居是
邦而想公之所由生拊是日而思公之所以死偉
哉烈丈夫視世之虛生浪死與草木俱腐者果何
如哉維時霜露淒淒木落草衰百拜英風奠此一
卮焄蒿悽愴如或見之千載遼鶴能不一歸以惠

顧鄉井之羣黎尚饗

音釋

拊音府循也焄音熏香氣也
焄蒿悽愴祭義

附祭陸家姑張夫人文

宋咸淳三年十月十六日前通直郎知臨安

府鹽官縣主管鹽監吳由率同官寓公邑

庠諸生以清酌庶羞 奠告于

唐烈婦陸家夫人張氏之神天寶之亂張中丞以

真源一令起兵討賊歷雍丘而睢陽與許公合共

守孤城卒死國難神於中丞為同氣依難弟於軍

中蓋嘗陳機事以說統戎躬補縫以拊士卒又率

先諸公以死一家姊弟相繼盡節忠義信有種乎

彼有男兒而為不義屈者視之真可愧死矣不在

祀事非闕典歟謹附祭于

敕封靈德慈懿許夫人

昭德慈福張夫人

善德慈信南夫人

仁德慈順雷夫人

明德慈濟姚夫人

感應天仙九娘娘之右尚饗

勅祭雙廟文

元順帝至正十三年九月十一日杭州路海

寧州達魯花赤兼勸農事知渠堰事禿堅

等

欽奉

聖天子明詔敢昭告於

護國忠靖威顯洪濟景佑真君忠義王許公

忠烈王張公

忠壯王南公

忠勇王雷公

忠濟王姚公惟神盡節天寶廟食海城功能輔國
徽稱令名

聖恩誕頒祭以特牲冀

神之祐永奠民生尚饗

祭雙廟文

明太祖洪武四年■月■日海寧縣儒學教

諭袁伯善等敢昭告於

許張二公嗚呼生爲忠臣歿爲明神節義之氣終
古弗泯偉二公之懋績光史籍而具陳瞻英風於
廟貌誠有感於後人人徒見其嬰城厲士僮妾食
軍皆裂齒碎奮不顧身而不知二公之功在守睢
陽以保江淮之民人徒見其糧援兩絕志節愈貞
抗言罵賊致死報君而不知二公之心在全江淮
以圖唐室之興蓋公所能者人所不能者天忠義

所當爲生死奚足論其厲鬼殺賊之誓至今凜凜
而猶存日吉兮辰良奠桂酒兮椒漿風車兮雲馬
靈曄曄兮飛揚感英雄於此日寧不激烈於中腸
眇孤城之瀕海迫戎事之擾攘率多士以告誡仰
靈德之洋洋嗚呼神之死旣能振綱常於萬世則
神之庥必能爲保障於一方尚饗

敕祭歸德州祭文

維

某年歲次某月某 越某日某

朔

皇帝遣歸德州知州某致祭于

唐御史中丞贈揚州大都督張公之神

唐睢陽太守贈荊州大都督許公之神

唐馬軍兵馬使贈揚州大都督南公之神

唐東平太守贈潞州大都督姚公之神

唐守睢陽裨將雷公之神

唐單父尉監察御史賈公之神惟

神咸稟至惟効忠所事捐軀殉節金石其心炳
光輝垂休永代君臣之義人道之綱風化所關表
勵宜厚爰命有司祇修常禮英靈斯在尚其饗之
附申請致祭事實

開封府歸州德爲陳言事承奉

河南等處承宣布政使司劄付承准

行在禮部正字三百六十九號勘合前事於行在
禮科抄出知州李志 奏看得本州乃唐時忠臣
張巡許遠等戰守死節故睢陽郡有協忠廟一所
內塑張許雷萬春南霽雲賈賁姚閻鄉人稱爲六

王雙廟史書云能保障江淮自唐宋元以來俱有
褒謚祭祀其碑文有曰雙廟忠義之寄將以啟天
下後世忠臣義士之心又曰天以完節畀之以爲
天下後世協忠者勸卽今未有祭祀本州欲行買
辦牲帛果品等物歲時致祭緣係前代之忠臣如
蒙

准言乞

敕賜以祭典庶使已往忠臣之名不泯將來忠義之
士由興等因具奏奉

聖旨禮部知道欽此欽遵抄出到部稽之史傳張巡

唐御史中丞贈揚州大都督許遠唐睢陽太守贈
荊州大都督南霽雲唐馬軍兵馬使贈揚州大都
督姚閻唐東平太守贈潞州大都督雷萬春唐守
睢陽裨將賈賁唐單父尉監察御史當安祿山之
變賊將史思明等侵犯睢陽其張巡許遠同心協
力率衆戰守保障江淮及力盡城陷俱能盡忠死
節理宜褒祀以爲天下後世忠義勸今議得張巡
許遠功績尤著宜居正祀其南霽雲等四人配享
欲行行在翰林院撰祭文所在官司支給官錢買
辦牲醴等物每歲春秋仲月擇日致祭緣係褒勵

忠節未敢擅便宜德元年三月十六日早本部官
於左順門

題奏奉

聖旨是欽此欽遵合行本司轉行開封府着落歸德
州當該官吏支給官錢照依開去牲醴品物銀兩
收買每遇春秋仲月擇日本處長官致祭如儀行
禮仍將用過官錢開報行在戶部知數毋得因而
侵擾承此擬合通行劄付本府轉行歸德州照依
勘合內事理至日務要誠敬蠲潔致祭毋得褻慢
奉此擬合就行帖仰本州文書到日照依劄付內

事理依期致祭施行奉此除遵依外行准知州李志關所有祭文儀注若不立石誠恐傳寫年久字或差訛不便准此合行立石謹志

明

宣德九年八月

吉日

賜祭海寧縣祭文

明洪武四年禮部定議海寧縣乃許公所生之地理宜崇祀以張公南公雷公姚公配饗之

明宣德四年奉以字二百六十八號勘合撰文敕賜鹽官致祭

維

某年歲次某十月某朔越十六日某杭州府海寧縣知縣某等敢昭告于

唐睢陽太守許公之神曰忠廻日月之光義振山

嶽之表是所謂臨大節而不可奪奮百世以特立者也斯乃模範人臣與天地而終始廟貌既崇於鄉邑英風永播於

皇朝茲因効節之辰誕告維新之典既優禮位福我邦人以

張國公

南國公

姚國公

雷國公配尚

饗

祭雙廟文

明世宗嘉靖十年歲次辛卯十月朔越十有六日賜進士第文林郎知海寧縣事胡堯

時其詞曰

嗟哉二公赫赫協忠遭時不造祿山肆兇漁陽鼙鼓雲擾京東潼關失守兩河望風二公倡義盡瘁厥躬起兵哭廟期建茂功寧陵合戰接應居中賊兵強勇似虎如熊剡蒿爲矢喪賊左瞳面中六箭將軍令恭賊爲雲梯勢如半虹鉄鈎藏穴木末置籠積薪爲磴乾蒿火紅借兵突出披靡折衝遺布

嫚罵嚙指筵中，縛蒿城下，得箭萬筒，圍繞數匝，穿
 壕三重，應機致用，賊伏智雄，二公有備，不敢復攻，
 援兵絕跡，內外不通，糧分濟濮，食盡計窮，羅雀掘
 鼠，殺妾烹僮，將士飢餓，諸軍疲癯，城陷被執，罵賊
 而終，厲鬼殺賊，立廟褒封，光昭日月，俎豆潔豐，二
 日救至，七日賊空，江淮保障，今古誰同，某職司茲
 土，敬仰其宗，廟期詣祭，盡節孟冬，聊伸拜獻，以表
 寸衷，尚祈昭格，錫祉無窮，尚

饗

歌詞

迎神

月維良兮日既望，鴈淒淒兮靡草黃，潔骨俎兮桂
 椒觴，導迎生氣兮睢之陽，龍媒蹀躞兮元雲翔，佇
 想五公兮下瑤堂，優如在兮曠祀舉，肅雍列兮羅

簪裳

釋音

膾音聊，膾間脂也。禮內則：肝膾，又音勞。詩
 小雅：取其血膾。龍媒，良馬名。優音愛，衍
 佛貌。禮祭義：祭之日入室，優然必有見乎其位。

奠幣

許國公

邑人楊

均

至德元禩兮王正錫之弓履兮于于宋城負君恩
 兮稱兵奮雌鯢兮雄鯨奪吾時以資叛兮士靡半
 菽而呼癸庚彼伯仲以視予兮吾求急於寧陵嗟
 血戰以百數兮救一絕而壘傾全本根於江淮兮
 固有死而實生撫乾斗之庚申兮招神爽於千齡
 廟食故鄉兮垂休炳靈

釋音 呼庚癸糧盡也

張國公

有烈真源兮雍丘起事哭立廟以討逆兮設帝像
 而誅貳流睢橫潰兮吾惟其砥城堞雅訊兮故人

欲死椎牛斲妾兮淚士如洗甲食裹瘡兮戰不勝
 而攻不已人畜共烹兮兵餘其幾西嚮拜啟兮臣
 力竭矣生不全城兮死為厲鬼英槩不泯兮于千
 萬世

釋音 注椎擊也擣也 斲音泥周禮朝事之豆
 實糜斲注有骨為斲無骨為醢

姚國公

烈烈東平相之裔歷尉而守從知己孤墉相守誓
 以死潞府元戎澤其子血食睢祠繪凌烟哀兮榮
 兮其兩至

南國公

挺忠壯兮頓丘。義有合兮身留。冒圍鐵兮乞師。對
 宴樂兮心憂。徒示信兮嚙指。莫之救兮虔劉。固將
 死兮不屈。渠違公兮作羞。靈連蜷兮於薦。羞朔吹
 兮颼颼。

釋音

蜷音權。虫形。屈曲。揚子雲甘泉賦。蛟龍連蜷于東厓。

雷國公

儼忠勇兮在唐。守雍丘兮毅以疆。六弩着面兮目
 不逃。將軍令兮敵心降。壓騎四百兮走披猖。城隳
 身殞兮鴻毛輕。千載廟祀兮休有烈光。

三獻詞

右調霜天曉角

初獻

丹楹轉月。金繡紛幢鉞。勛在有唐宗社。人千載仰
 英烈。維辰嗟盡節。故里昭虔揭。靈御離匕來下
 歆。初薦俎羞潔。

亞獻

當年宋壁。血壅河流赤。全護東南形勝。百易萬五
 神力。人心同奮激。立此生民極。哀角載歌霜曉
 斟。瓊醑聖容懌。

釋音

斟音拘。挹也。酌也。又水斗以角為之。容四升。醑音齊。去聲。鹹也。又醬也。

終獻

忠忱該幅對越如丹赤。緬想遺風餘烈，猶身見古
顏色。惟馨非黍稷，穆穆歆明德。簞灑芳彝，須醉
迴雲旆，佑鄉國。

釋音

忱誠也。與謹同。福音壁。悃。幅。至誠。旆音遂。以全羽。繫旗上。

送神

裸獻終禮紀具靈。禋禋迴霄馭，人祇分福祉聚。

釋音

禋音貫。祭酌鬯以灌地。禋音私。神不安欲去意。福祉祥也。祉音耻。喜也。

詞

沁園春

宋丞相文天祥題雙廟

為子死孝，為臣死忠，死又何妨。自光岳氣分，士無
全節，君臣義缺，誰負剛腸。罵賊張巡，愛君許遠，留
得聲名萬古香。後來者無二公之操，百鍊之鋼。嗟
哉人。生翕歛云亡，好烈七轟七做一場。使假當時賣
國甘心降賊，受人唾罵，安得流芳。古廟幽沉，威容
儼雅，枯木寒鴉幾夕陽。郵亭下有奸雄過此，仔細
思量。

按文信國景炎宋端宗年號時提兵勤王道經潮陽因

謁二公廟酌卮酒以進請與二公對飲祝曰公知

余心可為余一舉觴當以飛黃贈言畢見杯立傾

其半既而僕夫告公左驂仆矣遂葬馬廟門外今

有碣題為文馬塚云塚在潮陽東山郵亭前

此詞實文公過潮陽謁二公廟所作而續編通鑑乃收于留燕都之草悞也元潮州總管王用

文嘗有跋紀其事頗詳則此詞留題在潮無足疑者

公任福建詔安縣學尊大人也有龍湖里雙忠廟錄公所編著也寧邑雙廟被燬侯即捐俸鼎建

之詳卷二家廟世譜天啟四年下

沁園春

明賜進士第吏部文選清吏司郎中前行人

司行人邑人吳本泰題雙廟次文文山前韻

拔劍歌呼斗酒淋漓痛飲何妨看照人青史一雙

忠義扶天赤膽兩字綱常哭廟嬰城嚼齧罵賊血

汗游竟骨也香如公等乃生來鐵漢鬼亦雄剛

乾坤多少興亡總戰鬪紛紜夢一場彼奸回不道

雲消見現貞良為國蘭死留芳正使熊羆典周定

鼎何似彝齊餞首陽為張許任伊為管葛有甚商

量

國



